



14. maj.2023

UPA2023/122

Inatsisartut Suleriaasianni § 36 najoqqutaralugu apeqquteqaat aallavigalugu oqallisissiamik saqqummiivunga:

Najugaq qimannagu inunnik isumaginninnermut siunnersortitut ilinniagaqalernissaq anguniarlugu suliamik aallartitsinissamik periarfissaqaleqqullugu Naalakkersuisut peqquneqarnissaannik apeqquteqaat aallaavigalugu oqallinnermik siunnersuut.

(Naleraq)

Naleqqap oqallisissiaanut pingaarutilimmut Siumumiik qujavugut imatullu akissuteqaateqassalluta.

Ukioq kingulleq §37 aqqutigalugu apeqquteqaateqarpunga Isumaginninnermi siunnersortit kommunini amigaataasut qanoq amerlatiginersut kisianni taamani Naalakkersuisoq akissuteqarpoq Naalakkersuit ilisimasaat killeqartut apeqqutigalu iluamik akineqanngilaq. Taamaattumik 23. januar 2023 apeqquteqaateqaqqippunga paaserusullugu Naalakkersuisut itisilikkamik tamanna misissorusunnaat, aamma apeqqutigaara Kommunini tamani inunnik isumaginnittoqarfinni meeqqanik innarluutilinnillu sullissisutut atorfiit (normering) qanoq amerlatiginersut, taakkunannga qanoq amerlatigisut ullumikkut inuttaqannginersut aammalu atorfinni pineqartuni piusuniit qanoq amerlatigisut inunnik isumaginninnermik siunnersortitut ilinniagaqarsimasuunersut kiisalu Socialstyrelsep ullumikkutut Nuummi katersuullutik inissisimanagerat kommuninut innutaasunullu sullitanut pitsaanerpaatut Naalakkersuisut isigineraat. Taamatut apeqquteqaateqarpunga, Inatsisiliortutut isumaqarama pingaaruteqartoq inatsisiliatta malitsinneqarnissaannik kommunini suliaqartut qanoq inissisimanagera Naalakkersuisuniit Inatsisartuniillu aamma ilisimaneqarnissaat pingaaruteqartoq. Tassami tamatta soqutigisarivarput ajornartorsiutitta ukiorpassuarni uteqqiattumik oqallisaajuartut annikillisarnissaat. Tamannalu anguneqassappat sullissisut qanoq inissisimanagerat unammillernartitaallu ilisimasaqarfigisariaqaratsigit. Taamatut kimigiiserlunga paasiniaaninni paasivara illoqarfiit sorliit inunnik isumaginninnermi ilinniarsimasunik sulisoqarnerisut aammalu illoqarfiit sorliit ilinniarsimasunik sulisoqannginersut. Akissummi erserpoq:



Kommuuni Kujallermi meeqqanik inuusuttunillu aamma inunnik innarluutilinnik sullissisut 20-usussaasut taakkunangalu tallimaannaat isumaginninnermi siunnersortitut ilinniagaliupput.

Avannaata Kommuniani meeqqanik sullissisut, suleqatigiinnut aqutsisut ilanngullugit 24-nik sulisoqartussaapput taakkunangalu arfinillit inuttaqangillat. Sullissisut pingasut isumaginninnermi siunnersortitut ilinniagaqarsimapput, pingasut isumaginninnermi sulinermut siunnersortitut ilinniagaqarsimallutik. Avannaata Kommuniani inunnut innarluutilinnut sullissisut tallimanik sulisoqartussaapput, taakkunani sullissisut arlaannaalluunniit isumaginninnermi siunnersortitut imaluunniit isumaginninnermi sulinermi siunnersortitut ilinniagaqarsimasuunngillat.

Qeqqata Kommuuniani meeqqanik isumaginnittuni sullissisut 14-inik sulisoqartussaapput, taakkunanga marluk isumaginninnermi siunnersortitut ilinniagaqarsimasuupput. Qeqqata Kommuuniani meeqqanut innarluutilinnut sullissisut marlunnik sulisoqartussaapput taakkunani ataaseq isumaginninnermi siunnersortitut ilinniarsimasuuvoq. Qeqqata Kommuniani inunnut innarluutilinnut, siusinaartumillu soraarnerussutisialinnut utoqqarnullu sullissisut pingasuusunit marluk inunnik isumaginninnermik ilinniarsimasuupput.

Kommuuni Qeqertaliup isumaginnittoqarfiani, meeqqanut inuusuttunullu sullissisut quliusussaapput, taakkunanga marluk isumaginninnermi siunnersortitut ilinniagaqarsimasuupput sullissisorlu ataaseq isumaginninnermi sulinermi siunnersortitut ilinniagaqarsimalluni. Kommuuni Qeqertalimmi isumaginnittoqarfimmi inunnut innarluutilinnut sullissisut tallimaasussaapput taakkunangalu arlaannaalluunniit isumaginninnermi siunnersortitut ilinniagaqarsimasuunngilaq.

Kommuneqarfik Sermersuumi sullissisut katillutik 50,5-iusuni 27,5-it isumaginninnermi siunnersortitut ilinniagaqarsimasuupput.



§37-mik apeqquteqaatimma ersersippaa, kommunit Nuup avataaniittut imal. isorliunerusuni inissisimasut ilungersunartumik inissisimasut illoqarfiillu ilia inunnik isumaginninnermi ilinniarsimasunik sulisoqanngivissortut.

Akissutit pissarsiakka tunngavigalugit 21. April apeqquteqaateqaqqippunga, ulloq manna tikillugu suli akineqanngitsunik ilaatigut apeqqutigaakka, ullumikkut taamatut inissisimaneq Naalackersuisut qanoq nalilerneraat aammalu qanoq pilersaaruteqarnersut.

Siumumiik taamatut oqaaseqarluta taparserparput Naalackersuinikkut inunnik isumaginninnermi siunnersortinik amigaateqarneq pillugu naalackersuinikkut iliuseqartoqavittoqartariaqartoq, taamaattumillu Naalackersuisut Siumumiik kaammattorpagut ilinniartitaanikkut allatigullu siuarsaaqqullugit.

Doris J. Jensen, Siumut